

55 milliuns per gulivaziuns e fusiuns da vischnancas

Da las tractativas da la regenza grischuna

■ **(cc) La regenza ha deliberà las contribuziuns 2012 en il rom da la gulivaziun da finanzas intercomunala. Ultra da quai è ella sa fatschentada cun differentas fatschentas e cun divers projects da vischnancas e da regions.** Per contribuziuns da gulivaziun a vischnancas finanzialmain deblas e per contribuziuns per promover fusiuns da vischnancas en il Grischun vegnan duvrads quest onn circa 55 milliuns francs. La regenza ha deliberà las contribuziuns da la gulivaziun da finanzas 2012. Quellas sa repartan sco suonda:

– Per la gulivaziun da la forza fiscala vegnan pajadas contribuziuns da stgars 19 milliuns francs. Quest import vegn pajà a tut en tut 69 vischnancas.

– Als custs da las ovras publicas vegnan pajads circa 4,8 milliuns francs.

– En il rom da la gulivaziun dal bassegn spezial vegnan pajads totalmain 2,7 milliuns francs.

– A contribuziuns per promover fusiuns da vischnancas sco er a contribuziuns als custs da studis da fusiun vegnan pajads tut en tut circa 28,2 milliuns francs.

Chareschia negativa – nagina gulivaziun

Ils salaris fundamentals da las collavuraturas e dals collavuradors da l'administraziun chantunala e da las persunas d'instrucziun da las scolas popularas na sa midan betg per l'onn 2013. La basa da la decisiun da conceder in'eventuala cumpensaziun da la chareschia è per la regenza mintgamai il stadi da l'index naziunal dals pretschs da consum (numnà qua sutvart index) la fin da november.

Per la fin da november 2012 mussava l'index 103,2 puncts (basa december 2005 = 100 puncts). La differenza tar il stadi da l'index da la fin da november 2010 da 104,2 puncts importa minus 1,0 puncts. La regenza ha decidì da betg gulivar la chareschia negativa.



Era la fusiun da Lumnezia profitescha da la contribuziun chantunala.

Trais projects chantunals per ils 3 da mars 2013

La regenza ha fixà ils projects chantunals da votaziun per ils 3 da mars 2013. Dumengia, ils 3 da mars 2013 vegni votà davart las suandantas fatschentas chantunalas:

– XXIV. gieus olimpics d'enviern en il Grischun 2022;

– iniziativa chantunala dal pievel «Per elecziuns gistas» (iniziativa da proporz 2014);

– revisiun parziala da la constituziun chantunala (art. 16 cifra 6 CC, aboliziun dal referendum da las autoritads).

Plinavant ha la regenza preni enconuschientscha dal fatg ch'ils suandants

projects federals vegnan sutmess il medem di a la votaziun dal pievel:

– conclus federal dals 15 da zercladur 2012 davart la politica da famiglia;

– iniziativa dal pievel dals 26 da favrer 2008 «cunter remuneraziuns abusivas»;

– midada dals 15 da zercladur 2012 da la lescha davart la planisaziun dal territori.

Da vischnancas e da regions

– **Zuoz:** La revisiun parziala da la planisaziun locala, concludida da la vischnanca da Zuoz ils 11 da november 2009, vegn approvada. L'intent da la revisiun parziala è da reglar il tractament futur da las aclas tradiziunals che sa chattan sur il vitg e ch'èn sparpagliadas sin ina surfatscha da var 200 hectaras. Fin a duas aclas che vegnan anc duvradas da l'agricultura vegnan quests edificis duvrads per far vacanzas. Cun la nova planisaziun d'utilisaziun duai vegnir garantì che las aclas èn protegidas cunter midadas architectonicas che na sa cunfan betg cun il lieu e cun la tradiziun sco er cunter la decadenza. La planisaziun locala vegn approvada da la regenza senza il minim pregiudizi per in'eventuala midada totala d'intent da las aclas.

– **Arosa:** La revisiun parziala da la planisaziun locala, concludida da la vischnanca dad Arosa ils 11 da mars 2012, vegn approvada. Cun la revisiun parziala vegn engrondida la zona per deponias «Bruchhalde». Il volumen da la deponia vegn augmentà per var 207 000 a totalmain 557 000 meters cubic.

– **Saas:** La revisiun parziala da la planisaziun locala, concludida da la vischnanca da Saas ils 17 da favrer 2012, vegn approvada. L'intent da la revisiun parziala è quel da realisar ulteriuras piazzas da parcar privatas.

– **Soazza:** La lescha da construcziun, concludida da la vischnanca da Soazza ils 15 da mars 2012, vegn approvada.

– **Vaz:** A la vischnanca da Vaz conceda

la confederaziun in credit en il rom da la nova politica regionala (NPR) da 405 000 francs per il project «Engrondiment dal traject da bike al Corn cotschen», premess che la finanziaziun totala saja reglada sco prestaziun d'equivalenza tar il credit da NPR vegn garantida ina contribuziun chantunala da maximalmain 68 177 francs. Resalvada resta l'approvaziun dals credits necessaris tras il cussegl grond. L'engrondiment dal traject da bike al Corn cotschen» cumpiglia la construcziun da trajects da descensiu cun trais differents grads da difficultad tranter la staziun da mez Scharmoin e la staziun da val Canols.

– **Domat:** Il project «Tegia da vault – Waldhütte Domat/Ems» vegn approvà. L'edifizi simpel da lain ch'è planisà en il territori «Plong Vaschnaus» serva en emprima lingia sco «stanza da scola en il guaud». La patruna da construcziun è la vischnanca burgaisa da Domat. Quella surpiglia er la finanziaziun.

– **Buseno:** A la Calancasca SA, Lostalio, vegn concedida – cun pretensiuns – la permissiun per ina derschentada primara da la batschida Molina, vischnanca da Buseno, il pli baud per la primavera 2013. Ulteriuras derschentadas supplementaras na vegnan betg permessas per il mument. La batschida Molina è vegnida messa en funcziun l'onn 1951 ed accumulescha l'affluent da la Calancasca en in intschess da 134 kilometers quadrat. Dapi l'ultima derschentada l'onn 1996 è la batschida enterrada fermamain.

– **Luzein:** Al consorzi per aua persa dal Partenz central vegn garantida ina contribuziun da maximalmain 37 703 francs als custs supplementars da la 2. etappa per renovar la serenera Dalvazza.

– **Maiavilla:** La constituziun da la citad da Maiavilla dals 13 da november 2012 vegn approvada.

– **Puschlav:** La constituziun da la vischnanca da Puschlav dals 25 da november 2012 vegn approvada.